

Date – 22/06/2025

Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Prime Minister Narendra Modi kaihhruai BJP sorkar in mipui te hriselna kawnga hma a lakna pakhat - National Vector Borne Disease Control Programme (NVBDCP) chu Mizoramah pawh hlawhtling taka kalpui mek a ni.
2. International Yoga Day vawi 11-na chu nimin khan ram pumah uar taka hman a ni a, Mizoramah pawh hmun hrang hrangah hman a ni.
3. PM Modi-a'n Yoga chu khawvel pum huap inremna hmanrua a ni a, vantlang policy-ah a tel tur a ni a ti.
4. Egypt Foreign Affairs Minister Dr Badr Abdelatty chu ni hnih cham turin Thawhlelni hian India a lo thleng dawn.

<><><>

11 YEARS OF MODI GOVT (HEALTH)

Prime Minister Narendra Modi kaihhruai BJP sorkar in mipui te hriselna kawnga hma a lakna pakhat - National Vector Borne Disease Control Programme (NVBDCP) chu Mizoramah pawh hlawhtling taka kalpui mek a ni.

NVBDCP hnuaiah hian natna chi hrang hrang a awm, chung zingah chuan Malaria leh Dengue te chu Mizorama natna an hmuh chhuah ve zinga mi niin, heng natna do nan hian sorkar laipui kaltlangin nasa taka hmalak a ni.

Akashvani zawhna chhangin Information, Education and Communication (IEC) Consultant Deborah Lalpuii chuan, mizo mipui ten malaria dona chu an thlawp tha tih a sawi a, rah tha a chhuah mek niin a sawi bawk.

(Byte: Deborah Lalpuii)

Malaria bakah Dengue do beihpui hi kum 2012 atang khan kalpui a ni tawh a. Mizoram district pukuaah kalpui niin, Aizawl chu East leh West-ah thenhran a ni a, hemi bakah hian Kolasib, Champhai, Serchhip, Lawngtlai, Lunglei, Mamit leh Siaha-ah te kalpui mek a ni.

Malaria do nan hian thosi-len (Mosquito net) sem te, thosi hlo hmanga inchhung kah te leh a thlawna damdawia thosi-len chiah (Long-lasting insecticidal nets) te kalpui niin, thosi-len sem leh chiah hi kum thum dana kalpui a ni a, ruahman dan chuan nakkuma tih leh tura hmalak mek a ni.

Thosi-len sem hi khua zawng zawngah kalpui a ni lo a, malaria vei mi pahnih leh a aia tam an awmna khuaah kalpui niin, damdawia thosi-len chiah pawh malaria vei mi pakhat leh a aia tam an awmna khuaah kalpui a ni bawk.

<><><>

INTERNATIONAL DAY OF YOGA

International Yoga Day vawi 11-na chu nimin khan ram pumah uar taka hman a ni a, Mizoramah pawh hmun hrang hrangah hman a ni.

Akashvani zawhna chhangin, Zoram Medical College & Hospital-a Physical and Stress Management Instructor Pi Vanlalzami chuan Mizo zingah Yoga chuan hmun luahin hriselna ngaipawimawh an tam zel thu a sawi a, hmun hrana kal chhuak kher lo in mahni awm hmunah a tih mai thei tih sawiin zunthlum, BP sang leh Sciatica nei tan a tha bik a ti a, Mizoramah chuan Yoga chu taksa sawizawina ang chauha an kalpui thu a sawi bawk a ni.

(Byte: Pi Vanlalzami)

International Day of Yoga hi Mizoram chhunga district hrang hrang damdawiin, sub-center, Health and Wellness Centre, zirna in bakah hmun remchang dang dangte hman a ni a, Ministry of Ayush chuan kuminah hian taksa sawizawina lam bakah mahni chenna chhehvel humhalhna lam a ngaipawimawh a, inzirtirna a buatsaih bakah thing tiak phun a ni a, Kumin 11th International Yoga Day pual hian “Yoga for One Earth, One Health” chu thupui a hmangin Yoga chuan inpumkhatna leh damna a thlen tih hman a ni.

<><><>

RICE LEAF FOLDER

Khawzawl Dsitriect huamchhung khaw pathum - Vangtlang, Chalrang leh New Chalrang khua ten lo an neihnaa Buh eichhetu Hnahkhawr Pangang tunlaia puang mek nia sawi chu nimin khan Khawzawl District Agriculture Office atangin ADAO Pu Lalrammuana hovin Agriculture mithiam 3 in lovah kalchilhin an enfiah.

Chalrang leh New Chalrang khua te hian lo atan ram theh inang neiin chhungkaw 210 lo-ah Hnahkhawr Pangang hi hmuh tur a awm a, heng zinga chhungkaw 70 lo-ah hian a puang nasa a. Vangtlang khuaah hian chhungkaw 80 lo-ah Hnahkhawr Pangang hi hmuh tur awmin chhungkaw 10 lo-ah a puang nasa zual a ni.

Agriculture mithiam ten an endiknaah hian loneitute hnenah damdawi semin damdawi hman dan a taka inzirtirna an nei nghal a. Chalrang VCP Pu C. Chawngliana chuan an harsatna tawh te hria a, Agriculture Department in hma an laksak nghal chu lawmawm a tih thu sawiin hei hian Hnahkhawr Pangang in buh a ei chhiat tur pawh nasa takin a ven hman an beisei tih a sawi a ni.

<><><>

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PMJJBY

Women & Child Development, District Hub for Empowerment of Women, Lawngtlai leh State Bank of India Lawngtlai Branch tangkawp buatsaihin tunhnai khan, Government Region Higher Secondary School, Lawngtlaiah sorkar laipui hnuaia hmalakna inzirtirna leh inhrilhhriatna hun hman a ni.

Hmeichhia ten Bank kaltlanga hamthatna hrang hrang an neihtheihte chu he hunah sawiuar deuh niin, Pradhan Mantri Suraksha Bima Yojana (PMSBY) leh Pradhan Mantri Jeevan Jyoti Bima Yojana (PMJJBY) hnuaia hamthatna awmthei, tawhsual tawhpalh te, vanduaithlak taka nunna hial chan palh pawha Bank kaltlanga hamthatna awmthei leh chu hamthatna awm chu chhawr tangkai a nih theih nana tihtur te inhrilhhriat a ni.

An hun hman hi Gender Specialist Pu James VL Dika chuan a kaihruai a, zirlai 430 chuang telin, mithiam ten zirlaite chu an tana sorkar in hamthatna a ruahmante an zirtir bakah an nunkawng kaihhruaina atana pawimawh hrang hrangte an zirtir bawk.

<><><>

KUHVA TIAK

Lungleiah Agriculture Deptt hmalakna in - Agro Forestry hnuaiah Mualthuam North a loneitu te hnenah, nimin khan Kuhva tiak chhungkaw 89 hnenah bul 6000 semchhuah a ni.

Account & Treasury Deptt Jt. Director Pi Lalremtluangi Lunglei chuan kuhva tiak hi a vailiam a. A lian thama ching a, hralh tur tam tawk thar chhuak tur a chahin, Deptt-in scheme a siam thlang thiam turin a chah a, sorkar in a sem hi chu a bultanna ang lekah ngai tur in a fuih bawk.

Kuhva tiak hi Dist. Agriculture & Farmers' Welfare Deptt. hnuaia a sem niin Mualthuam 'N' VCP Pu V. Lawmkima chuan a kaihruai a, kuthnathawktu te an phur in beiseina sang tak nen Deptt lam pawh an thlir tih a sawi.

<><><>

Yoga day

PM Modi-a'n Yoga chu khawvel pum huap inremna hmanrua a ni a, vantlang policy-ah a tel tur a ni a ti.

Nimin khan International Day of Yoga vawi 11-na chu thahnemngai takin hman a ni a, ram pum leh khawvel hmun hrang hrangah mipui tam takin an

hmang a, President leh Prime Minister te chu hmun hrang hrangah yoga session-ah an tel a, lawmna hun hi an kaihruai a ni.

President Droupadi Murmu chu Uttarakhand-a Dehradun-ah inkhawm buatsaihah a tel a, khawvel hmun hrang hranga yoga tihlarna kawnga India-in a chanvo pawimawh tak a neih thu a sawi.

Prime Minister Narendra Modi hian Andhra Pradesh-a Vishakhapatnam-a tuipei kamah Common Yoga Protocol zawhah minute 45 chhung awh Yoga Session a tel a, Yoga Session-ah hian mi nuai thum chuang zet an tel a ni. He hunah hian PM Modi chuan yoga chu khawvel pum huap inremna hmanrua a nih thu a sawi a, hnam tinte chu an nunphung leh vantlang policy-ah yoga telh turin a ngen a ni.

<><><>

Egypt

Egypt Foreign Affairs Minister Dr Badr Abdelatty chu ni hnih cham turin Thawhlejni hian India a lo thleng dawn a. A cham chhung hian Dr Abdelatty hian Union Commerce and Industry Minister Piyush Goyal, Railways Minister Ashwini Vaishnaw, leh External Affairs Minister Dr S Jaishankar te a kawm dawn a ni.

<><><>